

Datum, 20.09.2019.

Br. Pr. 670/19

P R A V I L A

Fonda za stipendiranje „Prometej“

Uvod o Fondu

Fond za stipendiranje „Prometej“ je osnovan u avgustu 2017. godine pri Fondaciji tuzlanske zajednice od strane grupe mladih osoba na početku karijere, koji vjeruju da svako od nas može i treba da doprinese razvoju bh. društva. Oni su izabrali da svoja filantropska sredstva ulože u mlade i njihovo obrazovanje.

Svrha i ciljevi Fonda

Mladi u Bosni i Hercegovini se suočavaju sa velikim izazovima u periodu studiranja. Troškovi za knjige, smještaj i hranu mogu biti jako velike, a sredstva koja dobiju od roditelja ili koja mogu zaraditi od povremenih sezonskih poslova su skromna i često nedovoljna. Svrha Fonda je podržati mlade u njihovim naporima da se obrazuju, da budu aktivni članovi zajednice, te da budu nosioci razvoja i emancipacije bosanskohercegovačkog društva.

Upravo iz ovih razloga, Osnivači Fonda za stipendiranje su željeli pomoći perspektivnim studentima Univerziteta u Tuzli da lakše završavaju studij, ali i da kroz aktivno djelovanje u društvenoj zajednici promoviraju vrijednosti građanskih sloboda, demokratije, antifašizma, sekularizma i solidarnosti.

Fond je osnovan sa početnim iznosom od 3.300,00 KM u nadi da će se krug prijatelja ovog Fonda širiti i da će isti tokom godina stalno rasti i tako podržati što veći broj studenata.

Uslovi i kriteriji za dodjelu stipendija

Kandidat moraju ispunjavati sljedeće uslove za podnošenje zahtjeva za stipendiranje:

- Da je državljanin Bosne i Hercegovine,
- Da je u vrijeme podnošenja zahtjeva za stipendiranje navršio od 18 do 25 godina starosti,
- Da je prvi put upisao drugu ili višu godinu dodiplomskog studija Univerziteta u Tuzli,
- Da je ispunio sve obaveze iz prethodnog ugovora o stipendiranju (ukoliko je i ranije bio korisnik stipendije ovog Fonda ili Fondacije).

Komisija za izbor stipendista će se voditi utvrđenim kriterijima za izbor stipendista od kojih svaki nosi definisani broj bodova (od ukupnih 100) i to:

1. Dosadašnji angažman kandidata u zajednici (35 bodova)

Komisija će primjenom ovog kriterija vrednovati dosadašnji angažman kandidata u organizacijama civilnog društva, kao i eventualno ostvarena postignuća u oblasti nauke,



umjetnosti i/ili sporta, pri čemu će se naročita pažnja obratiti i dodatno bodovati izvrsnost i kreativnost u radu, kao i eventualno ranije djelovanje u skladu sa ciljevima i svrhom ovog Fonda.

Prijavni obrazac će obavezno sadržavati tabelu u kojoj će kandidati navesti svoj aktivistički angažman i to prema sljedećim kolonama: mjesto angažmana, vrijeme angažmana, aktivnosti, rezultati i reference (imena osoba koji mogu više reći o njihovom angažmanu).

2. Ekonomski status kandidata (10 bodova),

Komisija će prilikom primjene ovog kriterija cijeliti mjesečna novčana primanja koja ostvaruju roditelji / staratelji kandidata, kao i broj članova domaćinstva. Orijentaciono: Maksimalan broj bodova po ovom kriteriju će dobiti kandidati slabijeg ekonomskog stanja čiji roditelji / staratelji ostvaruju nikakva ili minimalna primanja, dok po navedenom kriteriju neće biti bodovani kandidati čiji roditelji / staratelji ostvaruju primanja koja prelaze tri prosječne neto plate ostvarene u FBiH. Komisija u svakom slučaju ima diskreciono pravo da prilikom bodovanja ovog kriterija cijeni i ostale specifične okolnosti koje utiču na ukupno ekonomsko stanje kandidata (npr. broj članova domaćinstva, drugi novčani izdaci kandidata i porodice i slično).

3. Uspjeh tokom studija (25 bodova),

Po ovom kriteriju kandidati će biti bodovani u rasponu od 0 do 25 bodova srazmjerno ostvarenoj prosječnoj ocjeni tokom studija u rasponu od 6.00 do 10.00, pri čemu će maksimalnih 25 bodova dobiti kandidat sa ostvarenom prosječnom ocjenom 10.00, do će 0 bodova dobiti kandidat ako je ostvario prosječnu ocjenu 6.00. Komisija će posebno cijeliti i eventualni dodatni stručni angažman kojeg je kandidat ostvario tokom studija (stručni seminari, naučni tekstovi i sl.)

4. Esej, motivaciono pismo i intervju (30 bodova)

4.1. **Esej (10 bodova).** Komisija će prije raspisivanja konkursa odrediti temu eseja, kroz koju će kandidati imati priliku da na kritički način izraze svoje stavove određenim pitanjima koja su značajna u Bosni i Hercegovini i globalno. Tema eseja će omogućiti provjeru stavova kandidata o temeljnim vrijednostima Fonda. Komisija će prilikom izbora stipendista eliminisati one kandidate čiji su stavovi i uvjerenja suprotni ciljevima i svrsi ovog Fonda. Rubrika „Esej“ sa određenom temom će biti sastavni dio prijavnog obrasca.

4.2. **Motivaciono pismo (10 bodova).** Kandidati će u motivacionom pismu imati mogućnost predstaviti vlastiti angažman u zajednici, obrazložiti svoje razloge apliciranja za stipendiju, motivisanost za aktivno djelovanje i doprinos zajednici, te promociju vrijednosti Fonda. Rubrika „Motivaciono pismo“ će biti sastavni dio prijavnog obrasca.

4.3. **Intervju (10 bodova).** Nakon bodovanja po svim prethodnim kriterijima, članovi Komisije će obaviti intervju sa najbolje rangiranim kandidatima i to sa najmanje dvostrukim brojem kandidata u odnosu na broj stipendija koje se mogu dodijeliti u predmetnoj akademskoj godini. Komisija će prilikom intervjuja provjeriti okolnosti o kojima su se kandidati izjašnjavali



u prijavnom obrascu, a naročiti će provjeriti posvećenost kandidata temeljnim vrijednostima Fonda, te njihovu spremnost na dalju afirmaciju i promociju ovih vrijednosti. Članovi Komisije imaju pravo da, zavisno od intervjua sa kandidatom, koriguju prethodno dodijeljeni broj bodova prema pojedinačnim kriterijima.

Podnošenje zahtjeva za stipendiranje

Prilikom podnošenja zahtjeva za stipendiranje potrebno je popuniti i dostaviti sljedeće:

- Popunjen zahtjev za dodjelu stipendije u okviru kojeg kandidat/kinja treba da napiše esej i motivaciono pismo,

U slučaju ulaska u uži krug izbora od kandidata će se zatražiti da dostave i sljedeće:

- Potvrda od Univerziteta u Tuzli da je kandidat prvi put upisao drugu ili višu godinu dodiplomskog studija;
- Dokument kojim se dokazuje ostvareni uspjeh tokom studija (ostvarena prosječna ocjena) i eventualni dodatni stručni angažman kandidata;
- Izjavu o ekonomskom statusu kandidata sa podacima o broju i ličnim primanjima članova domaćinstva, te eventualno drugim okolnostima koje utiču na ekonomsko stanje kandidata;
- Preporuke ili potvrde organizacija civilnog društva ili drugih organizacija koje se bave društveno korisnim radom (javne ustanove, mediji i slično) u kojima je kandidat do sada bio angažovan;
- Druge dokaze koji potvrđuju društveni angažman kandidata (umjetnički ili sportski angažman, objavljeni tekstovi i slično).

3

Popunjen zahtjev i dodatnu dokumentaciju potrebno je dostaviti e-mailom, poštom ili lično u prostorije Fondacije tuzlanske zajednice na adresu Pozorišna 13, 75000 Tuzla.

Javni poziv i rokovi za prijavu

Sredstva iz Fonda se distribuiraju nakon objavljenog javnog poziva za podnošenje zahtjeva za stipendiranje koji će biti blagovremeno objavljen na službenoj web stranici Fondacije, a koji će biti prosljeđen i medijima koji se distribuiraju na području Tuzlanskog kantona. Javni poziv za podnošenje zahtjeva za stipendiranje biće objavljen najkasnije do 15.septembra tekuće godine i trajati će 30 dana.

Javni poziv će između ostalog sadržavati i: informaciju o svrsi i ciljevima Fonda, mjesečni iznos stipendije, način podnošenja i sadržaj zahtjeva za stipendiranje, rok za podnošenje zahtjeva, uslove i kriterije za dodjelu stipendija.

Pravila i procedure za dodjelu stipendije

- Odluke o dodjeli stipendija donosi Komisija koju čini pet članova od kojih jednog imenuje Fondacija, dok četiri člana imenuju osnivači uz saglasnost Fondacije, s tim da u slučaju potrebe osnivači mogu prepustiti Fondaciji predlaganje ili izbor svih članova Komisije;



- Članovi Komisije mogu biti građani sa visokom stručnom spremom (ili njenim ekvivalentom), koji su do sada aktivno djelovali u zajednici i koji su uspješni u svom profesionalnom i drugom angažmanu.
- Članovi Komisije ne mogu biti građani koji su pravosnažno osuđivani, te koji su djelovali ili istupali suprotno ciljevima i svrsi zbog kojih je osnovan ovaj Fond.
- Odluku o dodjeli stipendija donosi Komisija najkasnije mjesec dana nakon zatvaranja konkursa.
- Odluku o dodjeli stipendija donosi Komisija na sljedeći način: Svaki član Komisije budoje svakog kandidata, koji ispunjava propisane uslove za dodjelu stipendije, prema propisanim kriterijima pri čemu se broj bodova prikazuje ukupno i pojedinačno prema kriterijima. Nakon toga komisija će održati intervju sa kandidatima, te će potom na sastanku nakon rasprave izvršiti sabiranje broja bodova za svakog kandidata i utvrditi konačnu listu. Svaki član Komisije ima pravo da na sastanku pojasni vlastito bodovanje kandidata ili da revidira dodijeljeni broj bodova. Sastanak Komisije će biti održan u službenim prostorijama Fondacije s tim da članovi koji nisu fizički prisutni mogu učestvovati na intervjuu ili sastanku putem interneta ili telefona.
- Odluka o dodjeli stipendija obavezno sadrži: imena i prezimena kandidata koji su izabrani za stipendiranje, imena i prezimena kandidata koji nisu izabrani za stipendiranje, broj bodova svakog kandidata (ukupno i prema pojedinačnim kriterijima).
- Odluka o dodjeli stipendija će se dostaviti osnivačima na uvid najkasnije u roku od 5 dana od dana donošenja odluke.
- Stipendije se izdaju u vrijednosti od 150KM mjesečno po jednom stipendisti tokom jedne godine.
- Broj stipendija zavisi od iznosa sredstava koji se prikupi do dana sastanka Komisije. Donacije koje budu uplaćene nakon sastanka Komisije se neće pripisati tekućoj akademskoj godini, nego će se prenijeti u narednu godinu stipendiranja.
- Komisija je obavezna da najmanje 20% novčanih sredstava koja su prikupljena u tekućoj godini zadrži i prenese u narednu godinu stipendiranja u svrhu postizanja dugoročne održivosti Fonda. Ova sredstva se mogu koristiti, u slučaju natpolovične saglasnosti svih osnivača, i u svrhu promocije Fonda, kao i u svrhu realizacije aktivnosti od strane stipendista.
- Svi stipendisti potpisuju Ugovor o stipendiranju sa Fondacijom tuzlanske zajednice, kojim će se, između ostalog, obavezati na vlastito volontersko učešće u aktivnostima Fondacije i drugih organizacija civilnog društva u skladu sa Zakonom o volontiranju, budući filantropski angažman, kao i djelovanje i promovisanje vrijednosti i ciljeva ovog Fonda. Sadržaj ovog ugovora će utvrditi Fondacija u saradnji i uz saglasnost osnivača.
- Stipendiranje za jednu osobu se vrši za period od 12 mjeseci počev od potpisivanja Ugovora o stipendiranju ili od dana koji je propisan Ugovorom o stipendiranju.
- Istom kandidatu može biti odobrena stipendija uz uslov da je kandidat upisao narednu godinu studija i ispunio sve uslove iz prvog Ugovora o stipendiranju.
- Komisija će voditi računa o ravnopravnosti spolova prilikom odabira kandidata.
- Nepotpune i neovjerene prijave neće biti uzete u razmatranje.



Način odlučivanja u Fondu

- Pravo odlučivanja u Fondu imaju svi osnivači koji uredno vrše uplatu minimalnog godišnjeg osnivačkog iznosa od 660,00KM
- Odluke se donose natpolovičnom većinom svih osnivača i to tako da svaki osnivač ima jedan glas.
- Izmjene i dopune ovih Pravila se vrše uz saglasnost 2/3 većine osnivača, a izmjene i dopune se mogu vršiti samo za narednu akademsku godinu.
- Sve Odluke se donose u saglasnosti sa Fondacijom u svrhu kompatibilnosti sa pravilima i ciljevima Fondacije.



Izvršna direktorica:

Jasna Jašarević